

1001 MASALAH

ABU AL-MUKHTAR SEDIA MENJAWAB



Pertanyaan-pertanyaan mengenai zakat daripada:

En. Sulaiman Najib,

Kampung Melayu Majidee,

Johor Bahru.

1. Bagaimana hukum mengambil wang zakat fitrah untuk mendirikan sebuah kelab (persatuan) kebajikan yang bertujuan untuk mengurus kematian dan mengajar ilmu-ilmu agama, tidakkah ini boleh dimasukkan di dalam erti kata *fī sabīlī Allāh*?

Jawab

Oleh sebab didapati di dalam beberapa hadith yang menyatakan bahawa fitrah itu termasuk di dalam istilah zakat juga, maka orang-orang yang bakal menerimanya hendaklah termasuk di dalam golongan asnaf yang delapan, sebagaimana firman Allah di dalam surat al-Barā'ah ayat (60):

"Innamā al-ṣadaqātū li al-fuqarā' i wa al-masākīnī wa al-'āmilīnā 'alayhā wa al-muallafati qulūbuhum wa fī al-riqābi wa al-ghārimīnā wa fī sabīlī Allāhi wa ibni al-sabīl." Ertinya: "Sesungguhnya sedekah-sedekah (zakat) itu adalah untuk:

1. Orang-orang fakir.
2. Orang-orang miskin.
3. Orang-orang yang memungutnya (amil-amil).
4. Orang-orang yang perlu dijinakkkan hatinya (mualaf-mualaf).
5. Memerdekaan hamba sahaya.

6. Orang yang berhutang.
7. Untuk dipergunakan di jalan Allah.
8. Orang-orang yang dalam pelayaran keputusan belanja.

Sungguhpun demikian menurut beberapa hadith Nabi *sallā Allāhu 'alayhi wa sallam* dan beberapa riwayat para sahabat *radiya Allāhu 'anhum*, maka kelihatan yang sangat dipentingkan dalam urusan mengeluarkan wang zakat fitrah itu ialah kepada golongan fakir dan miskin – kerana kedua-dua golongan ini yang terbanyak sekali bilangannya di kalangan umat Islam – oleh yang demikian itu pada pandangan kami wang zakat fitrah itu hendaklah dibahagikan terlebih dahulu kepada golongan fakir miskin, sehingga benar-benar merupakan golongan ini mendapat faedah yang sewajarnya daripada pembahagian wang zakat fitrah itu – bukan sekadar \$3 setahun

sebagaimana yang dibayangkan oleh Yang Mulia

Tan Sri Raja Mohar bin Raja
Badiozaman di dalam Persidangan Para
Alim Ulama di Bangunan MARA pada bulan
Februari yang lalu – kalau ada
kelebihan wang itu baharulah dibahagikan
kepada asnaf-asnaf yang lain.

Adapun zakat umum (zakat harta,
galian, ternakan dan lain-lain) selain
daripada zakat fitrah, bolehlah
dibahagi-bahagikan kepada delapan asnaf yang
tersebut di dalam ayat di atas. Atau ada

pembahagian wang zakat umum itu boleh diserahkan urusannya kepada pejabat-pejabat agama di dalam tiap-tiap negeri Islam untuk dipertimbangkan. Menurut pendapat kami tidak salah wang-wang zakat umum itu dibahagikan kepada satu atau dua golongan asnaf yang dirasakan perlu didahulukan atau dilebihkan pembahagiannya, kerana di dalam sesuatu negeri tidak tentu akan didapati ada semua asnaf yang tersebut di dalam ayat di atas.

Adapun perkataan "*fī sabīlī Allāh*" itu di permulaan Islam terkenal dengan makna "berperang di jalan Allah" atau lebih terkenal dengan nama "perang *sabīl*" kerana mempertahankan kemuliaan agama Islam daripada dicerobohi oleh musuh-musuh Allah. Tetapi oleh kerana perkataan "*fī sabīlī Allāh*" yang tersebut di dalam ayat tersebut adalah umum, maka sebahagian daripada para ulama tafsir dan ulama fikah faham bahawa apa-apa juga urusan yang baik yang bertujuan kepada kebajikan yang tidak melanggar perintah-perintah Allah dan rasul-Nya, boleh dinamakan "*sabīl Allāh*", seperti: mendirikan sekolah, masjid, surau, rumah sakit, rumah miskin, membetulkan jalan, memperbaiki jambatan, menyiarkan seruan agama dan sebagainya.

Dalam pada itu boleh juga dimasukkan hal mengurus kematian, seperti membeli kain kapan, keranda, batu nisan dan lain-lain keperluan untuk menguruskan mayat itu, dengan syarat hendaklah mayat itu seorang yang miskin.

Adapun mendirikan kelab atau persatuan dengan menggunakan wang zakat itu pada pandangan kita, tidak ada jalan sama sekali, kerana

mendirikan kelab itu tidak diberati oleh agama, sebab persatuan umat Islam di luar kelab itu sangat diutamakan oleh Islam, kerana kalau sudah terlampaui banyak kelab, maka di sana kelak akan timbulah rasa perkauman berkelab-kelab di antara satu golongan dengan golongan yang lain.

Dan lagi biasanya kelab-kelab itu itu dijadikan tempat orang bersuka-suka, ataupun boleh kita katakan tempat orang bermain-main.

Sekurang-kurangnya dijadikan tempat bermain terup, catur dan berbual-bual

kosong untuk mengisi masa lapang.

Membuang waktu dalam perkara yang sia-sia itu adalah dilarang oleh Islam.

Ia termasuk di dalam erti kata membazir. Seperti firman Allah:

Inna al-mubadhdhirīn kānū ikhwānā al-shayāṭīn. Ertinya: “Sesungguhnya orang-orang yang membazir itu saudara syaitan.”

Kita sama-sama menyaksikan pada zaman ini bukan sedikit kelab-kelab yang pada mulanya didirikan dengan tujuan yang baik, tetapi lama-kelamaan menjadi kelab maksiat, tempat berjudi,

minum arak, berzina dan gelanggang tari-menari dan lain-lain maksiat yang kecil dan besar.

Ringkasnya perkara-perkara yang dapat dimasukkan di dalam erti kata “*fī sabīlī Allāh*” itu, ialah segala perbuatan baik yang diperintah oleh agama atau sekurang-kurangnya perbuatan-perbuatan yang tidak melanggar batasan yang dilarang oleh agama, demi untuk faedah dan kepentingan umum, terutama sekali ilmu pengetahuan dan lain-lain wasilah yang tidak terkeluar daripada perkataan “*fī sabīlī Allāh*” yang dimaksudkan oleh Islam.

– Abu Al-Mokhtar

Buku Baru

Sudah Terbit

Khalifah ‘Umar bin ‘Abd al-‘Azīz

Khalifah ‘Umar bin ‘Abd al-‘Azīz bukannya sahaja seorang khalifah yang disegani oleh seluruh rakyat jelata di antara khalifah-khalifah Banī Umayyah, tetapi juga beliau adalah seorang khalifah yang bersifat adil seadil-adilnya untuk menegakkan hak dan kebenaran sesudah Saiyidina ‘Umar bin al-Khaṭṭāb.

Di dalam riwayat hidup Khalifah ‘Umar bin ‘Abd al-‘Azīz yang serba ringkas ditulis di dalam buku ini ada digambarkan sifat-sifat keberanian, ketulusan dan kejujuran beliau menjalankan satu-satu hukum di dalam pemerintahannya.

Bacalah sejarah hidup Khalifah ‘Umar bin ‘Abd al-‘Azīz yang penuh dengan perjuangan-perjuangan sengit menegakkan agama Allah. Disusun dengan jalan bahasa yang ringkas, mudah difaham dan senang dibaca oleh semua peringkat.

Dicetak dengan naskhah Jawi dan Rumi, waktu memesan terangkan naskah Jawi ataupun naskhah Rumi yang kehendaki!

Harga sebuah \$1.40

Belanja post 20 sen.

Pesanlah daripada penerbitnya:

QALAM

8247, Jalan 225.

Petaling Jaya, Selangor.